



SÁMIRÁÐÐI
SAAMELAISNEUVOSTO
SAMERÁDET
COJ3 CAAMOB
SAAMI COUNCIL

KONSEAPTAČILGEHUS FÁMUIDAHTTIT SÁMI-SEMINÁRA

Ollesbeaivvi seminára bearjadaga 12.08.2022 Sámiid 22. konfereanssa oktavuodas Váhčiris.

Duogáš

Doaba "fámuidahttin", dahje "empowerment" engelasgillii, čujuha doaimmaide, maid ulbmilin lea lasihit ovttaskas olbmuid, álbmogiid ja servošiid iešstivrejumi ja iešmearridanrievtti, vai sii nákcejit ovddastit ovdduideaset vásttolaččat ja vugiin, maid sii leat ieža mearridan. Dat lea proseassa, mas olmmoš šaddá nannosabbon ja oažžu stuorát jáhku alcces, erenoamážit iežas eallima hálddašeamis ja vuoigatvuodaid gáibideamis. Fámuidahttin-proseassa čujuha sihke iežas nannemii, ja maidái dasa, mo earát diđolaččat ja ámmátlaččat sáhttet dán proseassa doarjut. Fámuidahttima bokte sáhtta nákčet guođdit fámuhisvuodadovddu ja dovddu, ahte ii bastte váikkuhit áššiide. Dan sadjái oahppá fuobmát iežas návccaid ja vejolašvuodaid.

Sámi fámuidahttin lea viiddes fáddá, mii fátmasta mánggaid osiid min servodatovdáneamis. Das lea sáhka ealli gielain, eananvuoigatvuodain, nana ášahusain, buriin eallineavttuin, mánáin ja nuorain geat leat rámis iežaset duogášis ja identitehtas, ovttasbarggus riikkarájáid rastá, virkos kultur-eallimis, dutkamis ja oahpahusas mii lea heivehuvvon min dárbbuide, ja buhtes luonddus. Mii dárbbášuvvo, jus háliidit fámuidahttit Sámi? Mii lea min iežamet ovddasvástádus, ja mii lea earáid duohken?

Ulbmilat

Seminára ulbmilin lea hukset oktasaš áddejumi das, maid Sámi fámuidahttin gáibida. Seminára figgá hábmet buoremus ovdamearkkaid ja doaimmaid fámuidahttin dihte Sámi, ja seammás vástidit daid hástalusaid, mat mis ain leat.

Seminára maŋná sávvat, ahte oasseváldiin lea eanet máhttu iešguđet doaimmain, mat leat jodus miehtá Sámi ja láidestit fámuidahttin min servodaga. Mii sávvat maid, ahte oasseváldiin lea buoret áddejupmi das, mii gáibiduvvo fámuidahttin dihte Sámi ain eanet, ja ahte sii leat diđolaččat sihke daid vejolašvuodain ja hástalusain, mat Sámis odne leat.